

Fasnacht 2017

# D'Schnaps bagge

I ha im Quarter underperformt und ha dr Supervisor wägem Outplacement im Gnigg,  
Gemäss HR isch my WorkLifeBalance Out of Control – jetzt bringe si's aber digg,  
Dr CEO sait: «Sabbatical näh, Resette, mit Fighting Spirit in eTop Ranking g'lange.»  
...ka mir epper sage, was uf änglisch haisst: «Ihr kennet mir alli an Ranze hange!?»

Do die «Handschlag»-Affäre z'Therwil, mit däne junge Muselmane?  
gemäss Koran beriehre si nur die aigeni Frau – wo fiehrt das no aane?  
Fraue sin z'unterdrugge, sait das Buech – d'Feminischtinne mache e Riesegjammer  
dängg ych an d'Heidi Mück, find ich aber dr Koran dr Hammer.

Als Veganer nimm ych Spargle zer Vorspiis und e Pfäfferminz, das tuet au haile,  
denn e Blätzi us Dinkel und e Salatblättli – wo ych tue mit em Meersäuli taile.  
Denn git's e Portion Bohne und mit Fäncheltee spüehl ich mini Niere,  
Und wenn ych emol stirb, loss ych mi fachgerächt im Garte kompostiere.

Mi Sohn isch Master of Advanced Studies in Digital Business – Wow  
Mi Tochter isch Certificated in Human Capital Management – e erfolgrichi Frau.  
Bachelor of Sciene in Nursing – friehner hesch Granggeschweschter gsait  
Mi Brueder isch CFO specialized in Reporting und Head Insurance Right.  
Mi Frau isch Leader in Front End Engineering und coacht e Junior Clerk, oder zwai...  
Ych ha kai Titel – bi Shopping-Assistant und hard working Putzhobel dehai.

Isch irgendneume e Hundsverlochete - mit gratis Häppli, Schämpis und Wyy,  
kasch bombesicher sy, do isch d'Sabine Pegoraro derby.  
Ych ha das letschthi aim verzelt, dä hett mi denn uff d'Historie verwiese:  
...im vorletschte Joorhundert häh me uff die Art amme die Bedyrftige gspyyse.

Ey Mann Fuessball-EM letscht Joor, isch geil gsi Alte, aber Scheisse für Albanie,  
aber Island Alte – Island!! – tönt gaaanz kalt, aber isch glaub in Nöchi vo Spanie.  
Waisch, Wales – «Ey Alte, was isch Wales?» han i gfrogt eini, wo isch bi mir gsässe,  
hett gsait: «Ey chill Alte, weisch Wels – isch doch Fisch, Mann – kasch au frässe!»

Mängmol bin ych nur uff dr Jagd noch Pokemons – jo, es git halt so Dääg,  
do lauft mer bim ene Pokemon Stop in dr Freye so e Monschter yber e Wäg.  
Ych ha das Teil grad welle aabehagge – mit Power und Schmalz  
do sait e Passant näbe mir zue'nem: «Tag Frau Ackermaa, au scho uf dr Walz?»

Wenn im Wessels s'letschte Stündli schloot, ligt är vor s'Himmelsdyrri wie e Flundere,  
legt d'Händ uff s'Härz und wenn är s'Wasser ka bhalte, tät's mi wundere,  
Der Herrgott wird deerte stoh, mild lächle und sage – voller Gnaad:  
«Hanspeter, du griegsch kai Wolgge – fir di hämmer e Kischtevelo parat!»

Meine Damen und Cherren, missen wir sein nicht bleed,  
will ich, dass alle Leute in Schweiz das Weg, das will ich, mit mir geht.  
Habe ich lustige Arbeit und wenn rede ich deitsch, werde ich froh.  
Jä – toll, Herr Petkovic, aber s'wär no geil, wenn me sie au wurd verstoh!

Was ych jetzt verzelt, stimmt – ych wurd jo nie ybertryybe  
in de dytsche Altershaim wän si Sex per Rezäpt verschryybe.  
Jetzt hän mir Zwai – falls das au in dr Schwyz passiert,  
im Seniorezentrum vorsorglich zwai Zimmer reserviert.

Wenn am Säggsslyte d'Zircher um dä Schneemaa ummeritte, denn hetts se paggt,  
und s'letscht Joor hett's däm Böög noch 3/4-Stund efang dr Grind verjagt.  
Wenn ich dehai furt fahr, grieg ich au Schmärze im Kopf – je witer ewägg, je meh,  
und dr Grind verjagt's mir denn, wenn ich d'Ortsdaafele vo Ziri gseh.

Als Veganer nimm i Spargle zer Vorspiis und e Pfäfferminz, das tuet au haile,  
denn e Blätzi us Dinkel und e Salatblättli – das tuen ych mit em Meersäuli taile.  
Denn e Portion Bohne und mit Fäncheltee spüehl ych mini Niere  
Und wen ych emol stirb, loss ych mi fachgerächt im Garte kompostiere.

---

**Wottsch au by uns bänggle?**  
**Uff [www.vsg-basel.ch](http://www.vsg-basel.ch) erfahrsch meh!**

---

